

ԵՐԳԵՐ ՂՐԻՄԻ ՇՈՒՐՋԸ

Ղրիմի թերակղզուց տեղահան եղած հայերը, թե Սամարի տափաստանում գտնվելիս և թե Դոնի ափ գալուց հետո, երկար ժամանակ չէին կարողանում մոռանալ իրենց ծննդավայր Ղրիմը և միշտ հուռով էին, որ մի օր պիտի վերադառնան իրենց նախկին բնակավայրը: Նոր նախիջևանը հիմնվելուց հետո ևս միշտ են փորձեր եղել՝ փախչելու և վերադառնալու Ղրիմ, շատերին հաջողվել է այդ: Քաղաքի Մազիստրատի գործերի մեջ կան բազմաթիվ մեղադրական դատավճիռներ Ղրիմ փախչողների վերաբերմամբ: Օրինակ 1793 թվականին «Առաքել Նազարովի կինն՝ Ալմաստն գաղտուկ իրիմ փախչելու էր, իմացվեցավ. բռնեցինք, հարս արինք, Թերդի հազարն քեֆիլ ելե...»¹:

Այսպիսի դեպքեր խիստ շատ են:

Ղրիմ վերադառնալու ընդհանուր ցանկութունը այնքան մեծ է եղել, որ դրա շուրջը հորինված են բազմաթիվ երգեր, թեև դրանց երգելը Մազիստրատը արգելել էր, իսկ երգողներին՝ պատժել: Այդ երգերը մեզ չեն հասել, բայց մինչև այսօր նախիջևանցիք վաղ գարնանը, երբ դուրս է գալիս առաջին գարնանային զատիկ կոչված միջատը («պոճիկը») վերցնում են իրենց ձեռքերի վրա և դիմում նրան.

Զադի՛դ, զադի՛դ
Խրիմի շամփան ո՞րն է:

Ծերերը ասում էին, որ այդ զատիկ կոչված կարմրաշերտ սև միջատները թռչում են միշտ դեպի Ղրիմի կողմերը, փախչողները նրանց թռած ճամփի ուղղությամբ են գնացել դեպի Ղրիմ:

Մեզ հասել են հետևյալ անպաճույճ տողերը:

¹ Ս. Պապայան. Օրացույց 1920 թ. Նոր նախիջևան, 1919, էջ 88:

Զադի՛դ, զադի՛դ
Գարմիր բոշիկ,
Խրիմի շամփան ո՞ր քովն է,
Խրիմի շամփան ո՞ր քովն է.
Խրիմի շամփան մերն է,
Խրիմի շամփան մերն է,
Դուներս, դեղերս հոն է,
Արի՛, դա՛ր մեզի Խրիմ,
Ինքդ թեղ մը շուտ փախի՛ր:

Նոր նախիջևանից Ղրիմ տեղափոխվելը արգելված էր, բայց երբ Ղրիմը միացրին Ռուսաստանին (1783) և անցավ բավականին ժամանակ, սկսվեց նորմալ երթևեկություն, շատ և շատ նախիջևանցիք առանց Ղրիմ տեղափոխվելու ձեռք բերին այնտեղ խոշոր պարտեզներ և այգիներ: Նախիջևանցիք Ղրիմի այգեգործության մեջ մինչև վերջը բռնում էին պատկառելի տեղ:

Ղրիմից գաղթելուց հետո այնտեղի այգեպանները իսկույն սկսեցին պարտեզների և այգիների համար հարմար տեղեր փնտրել: Նրանք բռնեցին Դոնի ափը, բոլոր հովիտներն ու ձորերը: Դոնի ափին մեծ պարտեզ տնկեցին Չոռլուփյանները, որը իր գոյութունը պահպանեց մինչև 1900 թվականները, այնտեղ այժմ «Կարմիր Աքսայ» կոչված գյուղատնտեսական մեքենաների գործարանն է: Սուրբ Խաչ վանքի մոտերքը, Սալխըն տերեյում պարտեզներ տնկեցին Կոզոտյանները, որոնց ագարակում այժմ էլ գոյութուն ունի մեծ պարտեզ, Սըրմաքեշյանները, Բուրդոտյանները, Մկրտիչ Չոռլուփ-օղլուն և շատ ուրիշներ: Չոռլուփյանները և Կոզոտյանները սերնդե-սերունդ ըզրադվել են այգեգործությամբ: Մենք ներքևում մեջ ենք բերում այգեպան և գինեգործ Սերովբե Չոռլուփյանի մեզ հանձնած մի ուտանավորը, որը նրա ասելով կոչվել է «Չոռլուփի երգ», իսկ նրա մոտ ծառայող Թորոսի

ասելով, կոչվել է «կողոտի երգ», Սերովբեն
վերագրում է իր տոհմին:

Սուգաքի գերեն, Չատուի ջամփան,
Բախշա ունեի ես կովագան.
Չոր ու շամիշ, կինին բոլեն-բոլ
Գեմի-գեմի գրջամփեի Ստամբուլ:
Ջոռով առին, բերին նախշը վան.
էլլա, ինգա Սալխըն Դերան,
Արուն քրգինքով բախշա արի,
Ջամփան նայեցա օխտը դարի,
Ջառերը մեծցան, մորի դառձան,
Պաշլայից եմիշ տալ բավական.
Ֆըշնա, դերդալի, դեղին գեռաս,
Մեյդան կուկան, ինչքան ուզենաս.
Չեշիտ-չեշիտ տանձ ու խնձոր,
Ալիշա, գոգամ և սև սալոր,
Դեսքով-շենքով շադ փառավոր,
Ինչքան դուղիս, գեր ամեն օր,
Համա շունին հրիմի համը,
Սալորը թթու, աղու, անհամ.

Չկա հրիմի անուշ խուռման,
Սերկեկիլը և մուշմուլան,
Անուշ հոգով բուշտոտ այվան,
Գարմիր շումը և գաստանան,
Սև զեթունը, հեղը գապարան.
Չկա հրիմի համով թուզը,
Մանդա գաղինը, խոշոր օնգուզը.
Գարմիր շումը, անուշ հավողը
Չըսիրեցին հոսի ֆողը:
Ֆողդ սիրիմ, էսկի հրիմ,
Ֆողդդ, ջուրիդ ես մեռնիմ.
Հնար էղավ, նորեն կուկամ,
Հոքիս մարմինս քեզի գուգամ:

Սերովբե Չոռչուփյանի ասելով այս
խոսքերը շարադրել է Մկրտիչ Չոռչուփ-օղ-
լուի խնդրանոք Ս. Խաչ վանքի տիրացուն,
որ միշտ այցելած է եղել Մկրտիչ աղայի այ-
գին, իսկ երգի եղանակը տվել ու երգել է
Ստամպոլցի Օվանեսը, որը ապրել է անցյալ
դարի սկզբից մինչև նրա կեսերը: